

Takornariartitsisarnermik inuussutissarsiuqarnerup aamma nunami inuussutissarsiutit siuarsarneqarnissaat pillugit Inatsisartut inatsisaannut siunnersuummut nassuiaatit

Nassuiaatit nalinginnaasut

Nunatsinni inuussutissarsiutinik ineriartortitsinerimi killigititat pitsanngorsarniarlugit inuussutissarsiutinik siuarsaernerup iluani inatsisit pisariunnginnerulersinnissaat suliniutigalugu Naalakkersuisut aallartinnikuuvaat. Tamatuma inerneraa takornariartitsisarnermik inuussutissarsiuqarnermut aningaasalersuinikkut tapersiisarneq pillugu Inatsisartut inatsisaat 1996-imeersoq aamma nunami inuussutissarsiutinut aningaasalersuinikkut tapersiisarneq pillugu Inatsisartut inatsisaat 1998-imeersoq massakkut Inatsisartut inatsisaanni katinneqarmata. Inatsisit ataatsimut katinneqarnerat Inuiaqatigiit aqqissugaanerata pillugu iliuusissatut pilersaarummut 2000-imi ukiakkut ataatsimiinnermi saqqummiunneqartup piviusunngortinnissaanut taamatuttaaq alloriarneruvoq.

Tassani "namminersorluni inuussutissarsiutinut killigititat pitsaanerunissaat" pillugit suliniuteqarnermi tunngaviumik periaatsit ilaatigut tassaapput paasiuminassuseq (ilaatigut tunngavissat tigussaasut atorlugit) aqqissuussinerimi angusaqarluarnerunissat (ilaatigut aningaasalersuinerimi "putut" matunerisigut) aamma Namminersornerullutik Oqartussat aningaasaqarnermi peqataanerata namminersortut aningaasaqarnermi peqataanerannut malinnitsinneratigut. Anguniagaq ilaatigut tassaavoq inuussutissarsiutit ingerlanneqartut assigiinngiaarnerulersinnissaat aamma suliffeqarfiit unammillersinnaanerisa nukittorsarneqarnissaa.

Inatsisartut inatsisaata matuma imaata assigerluinnangajappaa nunami inuussutissarsiutinut aningaasalersuinikkut tapersiisarneq pillugu Inatsisartut inatsisaani siusinnerusukku atuu tumi tunngavigineqartut. Tamatumunnga pissutaavoq inatsimmit tassanga misilittakkat pitsaasuummata. Tassunga peqatigitillugu anguniagaq pingaarutilik aamma tassaavoq tapersiissutitut aningaasaliisarneq ajornanngitsunnguamik pisussaaffeqanngitsumillu aningaasannaffissatut isigineqarunnaarluni kisiannili ajornannginnerusumik annaasaqaratarsinnaagaluarluni aningaasaliinertut isigineqarnissaata tunngavittut aalajangiusimanissaa.

Inatsit taamaalilluni ilusilersorneqarpoq takornariartitsisarnermik inuussutissarsiuqarnermut aamma nunami inuussutissarsiutinut inuit suliffeqarfiillu aningaasanik pissarsinissamut assigiiaarnerusumik periarfissaqalernissaat

siunertaralugu. Tamatuma sunniutaanut assersuutitut taaneqarsinnaavoq takornariartitsinermik inuussutissarsiuqarnermi inuit suliffeqarfiillu kinguaariit nikinneranni aningaasanik ajorsarnerannut atatillugu aamma taarsigassarsinissamut qularnaveeqquserneqarsinnaalermata. Assersuutit aappaattut taaneqarsinnaavoq nunami inuussutissarsiuqarnermi aamma qularnaveeqquserneqarsinnaalermata tunisassiat ineriartortinnerannut atatillugu. Assersuutit pingajuat tassaavoq tunisassianik ineriartortitsinermut tapiiffigineqarnissamut aalajangersakkat inuussutissarsiuqarnermi marluusuni taakkunani aamma assigiilermata. Susassaqarfiit taakku marluk akornanni tapiissuteqartarnermut piumasaqaataasut annertunerusumik naligiissinneqalernissaata anguniarneqarnissaa siunertaasimavoq.

Taamaakkaluartoq nunami inuussutissarsiuqarnermi aamma takornariartitsinermik inuussutissarsiuqarnermi ataaseq pillugu suli immikkoortitsineqarpoq. Taamaattoqarneranut aningaasaateqarfiup Unnuisap takornariartitsinermik inuussutissarsiuqarnermi unnuisarfiliornissamut taarsigassarsinissarsarneranut tunngassuteqarpoq. Tamatumunnga ilaatigut pissutaavoq aningaasaateqarfiup siunertaanut aalajangersagaq ilaneqarluni annertusineqarmat, taamaalillunilu tamatuma sunniutai aatsaat piffissap ingerlareernerani malunniuttussaallutik, suli aammaarluni allanngortitseqqittoqannginnerani. Ilaatigut unnuisarfinnut taarsigassarsinissarsarnerneq pissutsinik assigiinngitsunik ilaqarnera pissutaalluni piuminaattarmat, soorlu aallarnisaasartunut aningaasalersuinikkut tapersiisarnermit. Taamaattumik aningaasaateqarfiup tassunga immikkut ittumut tunngatillugu oqartussaassuseqarnerata pigiinnarnissaa naleqquppoq.

Allaffissornikkut ingerlatsinermut sunniutissai:

Suliffimmik aallarniinnissamut, kinguariit nikinnerannut aamma tunisassianik ineriartortitsinermut tapiissuteqartarnerup qularnaveeqqusiisarnerullu aalajangiivigisarnerisa tiguneqarnerat Namminersornerullutik Oqartussanut allaffissornikkut ingerlatsinermi arlalitsigut sunniuteqassaaq, tassa allaffissornikkut ingerlatsinermi nammatat annertusiallattussaassammata.

Inatsisartut Ombudsmandiata inassuteqarneratigut nunami inuussutissarsiuqarnermi aningaasalersuinikkut tapersiisarnerup allaffissornikkut aqunneqarnera nalinginnaasumik allaffissornermi ingerlaatsimut ilanngunneqarpoq qulliunerusunut naammagittaalliorsinnaanermik kinguneqartussaalluni, taamaammat nunami inuussutissarsiuqarnermi pillugit naammagittaalliuuteqartarfik atorunnaarsinneqarsinnaanngorpoq.

Tamanna innuttaasunut suliffeqarfinnullu pitsaanngitsumik sunniuteqartussaannngitsutut nalilerneqarpoq.

Aningaasatigut sunniutissai:

Inatsisissatut siunnersuut immi aningaasatigut sunniuteqassanngitsoq tunngavigineqarpoq. Suliniutit qanoq annertutiginnissaanik kissaateqarnerneq aalajangersarneqartassaaq ukiumoortumik aningaasanut inatsisinut atatillugu.

Aalajangersakkanut ataasiakkaanut nassuiaatit:

§ 2-mut

Imm. 1-imut

Taaguut "nunami inuussutissarsiutit" suliffeqarfinnut aalajangersimasuunngitsunut atorneqarpoq ilaatigut sulianut aalajangersimasunut makkununga: Niuerneq, sanaartorneq sanaartukkallu, kiffartuussineq, akunnittarfeqarneq neriniartarfeqarnerlu, siunnersuineq, tunisassiorneq. Taakorneqartut tamakkiisutut isigineqassanngillat.

Imm. 2-mut

Aalisartut, piniartut nunalerinermillu ingerlataqartut tapersiisuteqarfigineqarnissamut qinnuteqarsinnaapput siunertanut aalisarnermut, piniarnermut nunalerinermullu tapersiisarneq pillugu Inatsisartut peqqussutaanni ilaatinneqanngitsunut.

§ 3-mut

Imm. 1-imut

Nunatta karsiata akiitsunut pisussaaffiisa pitsaasumik aqunneqarnissaat mianeralugu qularnaveeqqusiissutissat annerpaaffissaat ukiut tamaasa aalajangiivigineqartassapput. Naak Nunatta karsiata aningaasatigut nammakkerneqarnera aatsaat malunniuttassagaluartoq qularnaveeqqusiissutip akilertariaqalernerani, taamaattoq Inatsisartut aningaasanut inatsisaani ukiumi pineqartumi qularnaveeqqusiissutit amerlanerpaaffissaat ilaatinneqartassaaq. Tamanna inatsisip siunertaanut pissaaq ukiumi aningaasaliissutitut tunngatillugu oqaasertaliussami.

Tunisassianik ineriartortitsineq pillugu taaguummi sullissinerit aamma tunisassiat ilaatinneqarput.

§ 4-mut

Imm. 1-imut

Immikkoortoq 1-imi nassuiarneqarpoq unnuisarfiit inatsimmi qanoq paasineqassanersut. Taaguummi tassani pineqarput akunnittarfiit, pisullutik angalaartut unnuisarfii, illuaqqat asimiittarfiit illunullu assingusumik aaqqissuussinerit allat takornarianut Nunatsinniikkallartunut unnuinerminnut akiliuteqartartunut unnuiffissatut aaqqissuussat.

Unnuisarfinnik taasanut aamma ilaapput atortorissaarutit allat unnuinermut toqqaannartumik attuumassuteqartut, soorlu uffarfiit atortorissaarutillu allat sanaassamik suliniummut ilannguttariaqartut, soorlu init nerisarfik imaluunniit sutorniartarfik igaffittalik init amerlineqarnerannit pisariaqartinneqalersoq.

§ 5-imut

Immikkoortoq 1-imi pineqarput suliffeqarfimmik pilersitsineq (nr. 1) kinguaariit nikinneranni aningaasatigut ajornartoortut ingerlaqqinnissaat (nr. 2) aamma unnuisarfinnik pilersitsineq, allilerineq iluarsaassinerlu (nr. 4) inatsisitut atuussimasunit ingerlatitseqqiinerupput. Inuussutissarsiutini nunami ingerlatani tunisassianik ineriartortitsinermut qularnaveeqqusiineq (nr. 3) aalajangersagaavoq nutaaq, tassani naligiissinneqarlutik nunami inuussutissarsiutit aamma takornariartitsisarnermik inuussutissarsiutiteqarneq.

Aalajangesakkat ataasiakkaat pillugit oqaaseqaatittaaq ataaniittut innersuussutigineqarput.

§ 6-imut

Kinguaariit nikinnerannut atatillugu aaqqissuussinermi siunertaavoq periarfissaqarnissaq qularnaveeqqusiinissamut kinguaariit nikinnerat pissusissamisut ingerlagaluartoq avataaneersut sunniuteqarneratigut piviusunngortinneqarsinnaajunaaraangat.

Kinguaariit nikinnerat pitsaanerpaajusarpoq piviusunngortikkiartuaassallugu ukiut arlallit ingerlaneranni, taavalu kinguaariit ilaat tunuartussa qiffissap ingerlanerani toqugaangat taava kingornussisussat kissaatigisinnaasarpaat suliffeqarfimmit ima amerlatigisunik kingornussassanik aningaasannannissaq, kinguaariit nikinnissaat piviusunngortinneqarsinnaajunnaartarluni suliffeqarfillu matuinnartariaqalersarluni.

Taamatut pisoqarsinnaanera ilaatigut eqqarsaatigalugu Naalakkersuisut inuussutissarsiutigalugu aningaasaliisarnermik ilisimasallit peqatigalugit ikiuussinnaassapput kinguaariit nikinnerata piviusunngortissinnaanissaata isumagineqarnerani. Immikkut ilisimasallit naliliinerat naapertorlugu pineqarpoq kinguaariit nikinnerat aningaasat tungaasigut isigalugu isumatusaarnerusoq isumagissallugu.

§ 7-imut

Imm. 1-imut

Immikkoortoq 1-imi erseqqissarneqarput sanaassanik suliniutit qularnaveeqquserneqarnissaannik taarsigassarsissutiginnissaannilluunnit qinnuteqaatigineqarsinnaasut. Tassani pineqarput illuni pioreersuni siunertanut allanut atorneqarsimasuni unnuisarfiliornissaq (imm. 1, nr. 1), illunik pioreersunik unnuisarfittut atorneqartunik allilerinissaq (imm. 1, nr. 2), illuni nutaani unnuisarfiliornissaq (imm. 1, nr. 3) aamma unnuisarfinnik pioreersunik iluarsaassineq (imm. 1, nr. 4). Iluarsaassinermi pineqanngillat ataavartumik aserfallatsaaliineq nalinginnaasumillu iluarsaassineq, soorlu qaqorterneq, qalipaaneq aamma iikkanik qilaamillu ungalisalersuineq kiisalu naqqit suliarinerat.

Takornariartitsisarnermik inuussutissarsiupeqarnermut aningaasalersuisarnikkut Inatsisartut inatsisaata UKA 2000-imi suliarineqarnerani tapiliullugit sanaassanik suliniutit pineqartut ilanngunneqarnerat isumagineqarpoq. Allanguinerit sammisaqarfik pillugu misissueqqissaarnermik aallaaveqarpoq, Inatsisartunit 2001-imut aningaasaliiffigineqartumit.

Imm. 2-mut

Suliniutit ataasiakkaat nalilersornerini pingartinneqassaaq, teknikikkut isumannaatsuunissaat aamma siunissaq isigalugu aningaatigut imminut akilersinnaanissaat. Teknikikkut isumannaatsuutitsinissamik nalilersuinermi sulianut tunngasuni nalit atorneqartut aamma maligassiat tunngavigineqassapput. Aningaasatigut imminut akilersinnaassuseq pillugu nalilersuinermi ingerlatsinermi aningaasarsiornermik nalilersuisarneq aallaavigineqassaaq.

§ 8-mut

Imm. 1-5-imut

Qularnaveeqqusiisoqarsinnaavoq taamaallaat taarsigassarsianut niueqatigiinnermi atugassarititaasut malillugit taarsigassarsiarineqarsimasunut aningaaserivimmi realkreditinstituttimi akuerisaasumi imaluunniit Nunat Avannarliit Killiit Aningaasaateqarfianni. Aningaasaliisarnermik ingerlataqarfiit tamakkerlugit nalunaarsorneqarput.

Aningaasaliisarnermik ingerlataqarfiit taaneqartut tamarmik nunatsinni ingerlataqartuupput. NORA, Sulisa A/S aamma kommunit inuussutissarsiornermut suliffissaqartitsiniarnermullu aaqqissuussineri matumani ilaatinneqanngillat, tassami aaqqissuussinermi siunertaamat niueqatigiinnermi nalinginnaasumik atugassarititaasut naapertorlugit taarsigassarsinermut qularnaveeqqusiisarneq. Taamatut aaqqissuussineq toqqarneqarpoq Nunatsinni aningaasalersuisarnermi unammilleqatigiinnermik kiputtoortitsinissaq sapinngisamik killilersimaarniarlugu.

Qularnaveeqqusiisoqarsinnaavoq taarsigassarsiat annerpaamik 50%-iinut aamma taarsigassarsiat sivisunerpaamik ukiuni qulini taarsersorneqartussaasariaqarput. Taamaalilluni pisortat aamma aningaasaliisartut namminersortut ataatsimut annaasaqaratarsinnaapput taavalu nammineq aningaasaatiginngisanik aningaasaliisartutut attaveqaataasoq piumassuseqarnerulissalluni namminneq - taamalu aamma pisortat - annaasaqaratarsinnaanermik sapinngisamik minnerpaatinniarnissaanut.

Pisortat annaasaqaratarsinnaanerisa qummut killilerneratigut qulakkeerneqassaaq inuussutissarsiutigalugu nammineq aningaasaatiginngisanik aningaasaliisartutut attaveqaataasut taamaallaat aningaasalii humanissaat tamanna immikkut ilisimasalittut isumatusaarnertut nalilerunikku.

Inuussutissarsiuteqarneq pillugu Inatsisartut inatsisaat naapertorlugu inuussutissarsiummik ingerlataqarsinnaatitaasut pingaarnertut maleruagassat malillugit Nunatsinnut tamakkiisumik akileraartussaataassapput. Qularnaveeqqusiisuteqartarneq Nunatsinni inuussutissarsiummik ingerlatsisinnaatitaasunut taakkununngarpiaq saaffiginnippoq.

Imm. 4-mut:

Immikkut ilisimasalittut aningaasaqarnermik naliliinermi ersersinneqarsinnaassaaq ingerlatsinermut aqutsinermullu tunngatillugu piginnaasassat pisariaqartinneqartut pigineqarnerat.

§ 9-mut

Namminersornerullutik Oqartussat inissisimalissapput piumasaqaatinut sumiginnakkat, nammineq aningaasaatiginngisanik aningaasalersuisartutut attaveqaataasup akiitsulinnut piumasaqaatanut, Namminersornerullutik Oqartussat akiliisussatut pisussaaffiata annertussusianut naleqqiullugu naapertuuttumik.

Naalackersuisut aamma aningaasaliisarnermik ingerlataqarfik marluullutik taarsigassarsiaritamut pisussaaffeqarnerat isumaqarpoq, aningaasaliisarnermik ingerlataqarfimmut kajuminnarnerussasoq qularnaveeqqusiisuttip piviusunngortinneqarnissanik aatsaat piumasaqassasoq, taarsigassarsititsinermi aqqissuussinerup ingerlatiinnarnissaanut periarfissat piviusut tamarmik atorneqareerpata.

§ 10-mut

Imm. 1-imut

Aningaasaateqarfiup Unnuisap siunertaa pingaarneq tassaavoq taarsigassarsisitsissalluni ernialerlugit taarsigassarsiatut imaluunniit taarsigassarsiat erniaqartillugu taarsersuutitaqanngitsut aamma taarsigassarsiat erniallit

akuleriissillugit, takornariat unnuisarfissaannik pilersitsinissamut, alliliinissamut aamma iluarsaassinissamut atugassanik. Aningaasaateqarfiup ernialerlugit taarsigassarsisitsinnaanera inatsimmi aalajangersagaavoq nutaaq. Aningaasaateqarfiup tamatuma saniatigut isumagisinnaavai qularnaveeqqusiinissamut atatillugu suliassamik piareersaaneq aamma periarfissanik misissuineq takornariatitsisarnermullu tunngasunik periarfissanik misissuineq aamma suliassanik nutaanik sulissutiginninneq. Aningaasaateqarfik taamaalilluni periarfissaqarpoq misissuineqqissaarnernik, periarfissanik piviusunngortinneqarsinnaasunik misissuinerneq assigisaannillu pilersitsissalluni, aningaasaateqarfiup isumaa naapertorlugu unnuisarfitsigut neqeroorutit aamma pitsaassutsit takornariatitsisarnernik inuussutissarsiuuteqarnermi massakkorpiaq naatsorsuutigineqartumillu pisariaqartitsinissamik ilimagisat naleqqussarneqarnissaanut atugassanik.

Imm. 2-mut

Immikkoortoq 2-mi takuneqarsinnaavoq, aningaasaateqarfik pilersinneqartoq Namminersornerullutik Oqartussat aningaasanngorlugit akilerlugit aningaasaliissuteqarnerisigut. Takuneqarsinnaavoq tamatuma kingorna, aningaasaateqarfimmuut aningaasanut inatsit aqutugalugu aammaarluni aningaasaliisoqarsinnaasoq. Tamatumunnga tunngavilersuutigineqarpoq nalilerneqarmat inatsisigut pituttugaasunik ukiumoortumik aningaasaliissuteqartarneq naleqqutinngitsoq, tamatumani aalajangiisuulluni apeqqutaammat ukiumoortumik aningaasanut inatsisissap isumaqatigiinniutigineqarnerani pingaarnersuilluni tulleriinnilersuineq. Aningaasaateqarfik Namminersornerullutik Oqartussanit maannamut aningaasaliiffigineqarpoq katillugit 27 mio. kr.-inik (15 mio. kr.-it 1997-imi aamma 12 mio. kr.-it 1998-imi, kisianni 1999-imi 2000-imilu aningaasaliisoqarani). 2001-imut aningaasanut inatsimmi immikkoortinneqarput 500.000 kr.-it. Aningaasaateqarfik aningaasaliivigineqanngippat imaaratariaannaavoq, aningaasaateqarfiup siunertami naammaginartumik naammassinissaa ajornartorsiutigileraa. Tamatuma saniatigut imm. 2-mi aalajangersagaq periarfissiivoq soqutiginnittut allat aningaasaateqarfimmuut aamma aningaasaliisinnaanerat. Soqutiginnittut allat assersuutigalugu tassaasinnaapput aningaasaateqarfiit allat imaluunniit ineriartortitsinermik pilersaaruteqarfiit.

Imm. 3-mut

Aningaasaateqarfiup akisussaaffigimmagu pisortat aningaasaataannik amerlasuunik aqutsineq, imm. 3-mi aalajangersagaqarpoq aningaasaateqarfik Naalakkersuisunit nakkutigineqartoq aamma alapernaanneqartoq, taakkua nakkutigissallugu aningaasaateqarfiup inatsimmi matumani aalajangersakkat malillugit ingerlanneqarnissaa. Tamanna ilaatigut isumaqarpoq, Naalakkersuisut alapernaaffigissagaat aningaasaateqarfik qinnuteqartumut aamma sanaassamut taarsigassarsisitsinersoq piumasqaatit erseqqinnerusut naapertorlugit, tamannalu pinersoq aningaasaateqarfiup siunertaa malillugu. Naalakkersuisut nakkutilliinermik alapernaannissamillu isumaginninnissaannut aalajangersarneqarpoq, Naalakkersuisut

piumasarisinnaagaat paasissutissat pisariaqartinneqartut aningaasaateqarfiup tunniutissagai.

Imm. 4-mut

Imm. 3-mi tunngavilersuutitut taaneqartutulli imm. 4-mi aalajangersagaqarpoq, aningaasaateqarfiup ukiumoortumik naatsorsuutai qaammatisiutit ukiuat malillugu ingerlasut kukkunersiorneqartassasut kukkunersiuisumit naalagaaffimmit akuerisaasumit Naalakkersuisunit toqqakkamit.

Imm. 5-imut

Aningaasaateqarfiup taarsigassarsisitsisarnermi saniatigut aningaasaatini atorsinnaavai ingerlatanut § 10, imm. 1-imi taaneqartunut taakkulu ilai ikittunnguit allaffissornikkut ingerlatsinermut.

Imm. 6-imut

Imm. 6-imi aalajangerneqarpoq aningaasaateqarfik taarsigassarsisitsinermini inatsimmit pituttugaasoq taamaallaallu qinnuteqartup aamma sanaassap piunasaqaatit §§ 4 aamma 7-imi aalajangersarneqartut pisariaqarpallu maleruqqusat inatsit tunngavigalugu pilersinneqartut eqqortippatigik.

Imm. 7-imut

Aningaasaateqarfik imm. 7 naapertorlugu allatseqarfimmik pilersitsissaaq taamaaliornissarlu suliffeqarfimmut naapertuuttumut isumagisassanngorlugu isumaqatigiissutigisinnaallugu. Tamatumunnga tunuliaqutaasoq tassaavoq, aningaasaateqarfik taamaalilluni periarfissaqassammat allatseqarfimmi suliaasat, soorlu ingerlatseqatigiiffimmut namminersortumut, allatseqarfimmik pilersitsereersimasumut saniatigut takornariartitsinermik inuussutissarsiuteqarnermik immikkut ilisimasalimmut, tunniunnissaannut. Periarfissaq taanna eqqarsaatigineqarsinnaavoq atorineqartoq aningaasaateqarfiup allaffissornikkut ingerlatsinermut aningaasartuutai sapinngisamik appasitsinniarlugit.

Imm. 8-mut

Imm. 8-mi qulakkeerneqarpoq qularnaveeqquserneqarnissamik qinnuteqaatip nakerisarsiunngitsumit naliliiffigineqarnissaa.

Imm. 9-mut

Aningaasaateqarfik § 10, imm. 1 naapertorlugu inatsisikkut pilersinneqarmat imm. 9-mi aalajangerneqarpoq aningaasaateqarfik atorunnaarsinneqarsinnaasoq inatsisikkut. Aningaasaateqarfiup atorunnaarsinneqarnerani aningaasaateqarfiup aningaasaatai tamarmik Nunatta karsianut nakkartinneqassapput taavalu Namminersornerullutik Oqartussat aningaasaateqarfiup pisinnaatitaaffii pisussaaffiilu tamaasa tigussavaat.

§ 11-mut

Imm. 1-imut

§ 11-mi allaqqavoq, aningaasaateqarfik aqunneqassasoq siulersuisunit tallimanik ilaasortaqartumit taakkunungalu sinniisussanit. Taamatut killilimmik amerlassusilernerannut pissutaavoq qulakkeerniarneqarmat siulersuisut sapinngisamik suleriallammanissaat. Siulittaasoq siulersuisunilu ilaasortat allat Naalackersuisunit toqqarneqassapput ukiut marlukkuutaarlugit, aningaasaateqarfiup pilersinneqarneranit aallartittumik. Pingaartinneqarpoq siulersuisut inuussutissarsiornermut paasisimasaqarnissaat. Tamanna anguniarlugu siulersuisunut ilaasortat pingasut taakkualu sinniisussaata Naalackersuisunit aatsaat toqqarneqassapput Greenland Tourism A/S, Takornariaqarneq pillugu Siunnersuisoqatigiit aamma Kalaallit Nunaanni aningaaseriviit inassuteqarnerisigut - taavalu ilaasortat pingajuat sinniisussaalu - Sulisitsisut Peqatigiiffiannit aamma Nunatsinni Niuernermi, Sullissinermi Assartuinermi Sulisitsisut Kattuffimmit peqatigiilluni. Kiisalu aalajangersakkami aalajangersarneqarpoq aningaasaateqarfimmi siulersuisunut Aningaasaateqarfimmi siulersuisunut ilaasortaaneq inuiaqatigiinni suliassaartitaanerunngitsoq. Tamanna ilaatigut isumaqarpoq kinaluunniit pisussaaffeqanngitsoq aningaasaateqarfimmi siulersuisunut ilaasortanngornissamut.

§ 12-imut

Immikkoortoq 1-imi erseqqissarneqarput taarsigassarsisitsinermi atugassarititat assigiinngitsut.

§ 13-imut

Imm. 1-imut

Aaqqissuussinermi pisoqqami ernialinni taarsersuutitalinnillu taarsigassarsititsineq annerpaamik 40%-iuvoq. Taarsigassarsilluni aningaasalersuinerup annerpaaffissaa tassaavoq unnuisarfimmik pilersitsinermut imaluunniit alliliinermut aningaasartuutit 40%-iat. Tapersiissutip procentia aalajangerneqassaaq suliniutit ataasiakkaat imminnut qanoq akilersinnaatiginerat aamma suliniutit allamit aningaasalersorneqarnissaannut periarfissat nalilernerisigut. Sunniutissaatut naatsorsuutigineqarpoq suliniutit allatut iliorluni aningaasaliiffigineqarsinnaanngitsut aammattaarlu imminnut akilersinnaasutut nalilerneqartut aningaasaateqarfimmit siunissaq isigalugu aningaasaliivigineqartarsinnaanerat. Aamma piumasarineqarpoq, taarsigassarsiat erniallit taarsigassarsisitsilluni aningaasalersuutit tamarmiusut minnerpaamik 50%-erissagaat.

Imm. 2-mut

Immikkoortoq 2-mi oqaatigineqarput taarsigassarsiat akilersornissaanut piffissaliussat aamma erseqqissarneqarlutik erniaqanngitsumik taarsersuutitaqanngitsunillu taarsigassarsianut piumasaqaatit. Sivissusianut piffissaliussamut tunngatillugu anguniarneqarpoq taarsigassarsianut atilequtaasunut tamatuma assingunissaa.

Imm. 3-mut

Immikkoortoq 3-mi erseqqissarneqarput ernialinnik taarsigassarsianut atugassaritat.

Imm. 4-mut

Immikkoortoq 4-mi aalajangerneqarpoq, aningaasaateqarfiup taarsigassarsialiussai qularnaallisassagai unnuisarfiup taarsigassarsisitsissutigineqartup qularnaveeqqusiunneratigut. Qularnaveeqqut tulleriiaarinermi sapinngisamik pitsaanerpaamik inissisimassaaq, tamanna isumaqarluni, aningaasaateqarfik soorunami salliutinneqarsinnaanngitsoq ima pisoqartillugu illuni pioreersuni unnuisarfiit allineqarneranni iluarsaanneqarneraniluunniit unnuisarfinnut qularnaallisaatit qularnaveeqqusiunneqareersimasunit. Paarlattuanik tamanna aamma isumaqarpoq, aningaasaateqarfiup qularnaveeqqusiinera salliutinneqassasoq nutaamik qularnaallisaatinut naleqqiullugu, soorlu unnuisarfiit allineqarnerat iluarsaanneqarneralluunniit pissutigalugu ingerlatsinermut aningaasalersuinerup pisariaqartitsinerup annertuseriarnera pissutigalugu. Qularnaveeqqusiissut unnuisarfiup pioreersup allineqarnerani iluarsaanneqarneraluunniit, unnuisarfiup allineqarneranik pissuteqartumik ingerlatsinermut aningaasalersuutinit tamatigut salliutinneqartassaaq. Taamatut salliutinneqarnissamik piumasaqaammut pissutaavoq, taarsigassarsisitsisoqartarmat unnuisarfimmik pilersitsinermut, alliliinermut iluarsaassinernulluunniit, tassa ingerlatsinermut tunngaviusunut, taarsigassarsisitsisoqartaranili ingerlatsinermut tapiissutit.

Qinnuteqartup 40%-imik aningaasalersuisarnikkut tapersiissuteqarfigineqartup pisariaqartissammagu sanaassap ilarujussuata allaninngaanniit aningaasalersorneqarnissaa, soorlu aningaaserivinniit, imm. 4-mi aammattaaq aalajangerneqarpoq, aningaasaateqarfiup qularnaveeqqusiissutaata ataqqissagai allaninngaanniit aningaasaliissutit, taamaattoq aningaasartuutit tamarmiusut § 13, imm. 1-imi taaneqartut, qinnuteqartup sanaassamut atugassatut pissarsiarisimasaasa annerpaamik 40%-ii. Aningaasaateqarfiup qularnaveeqqusiissutaa sallinnguukkiartuaartussatut qularnaveeqqusiissutaanngilaq.

§ 14-imut

Imm. 1-imut

Immikkoortoq 1 ilanngunneqarpoq, unnuisarfinnik pilersitsinernut, alliliinernut iluarsaassinernulluunniit taarsigassarsiaritinneqareersut siunertanut inatsisip uuma avataaniittunut atorineqarnissaat pinngitsoorniarlugu.

Imm. 2-mut

Piginnittup ninneranunut tunngatillugu iimmikkoortoq 2-mi aalajangerneqarpoq nutaamik piginnittunngortoq sanaassarlu naliliivigineqassasut §§ 4-mi aamma 7-mi piumasaqaatit malillugit nutaamik naliliinikkut. Tassani pineqarpoq piginnittut ninnerat, unnuisarfiit assigiinngitsunik pissuteqartumik piginnittuisa taarserneqarnerinut pissutaasut, soorlu tassaasinnaallutik unnuisarfiit nammineq piumassutsimik pinngitsaaliissumilluunniit tunineqarnerat, avinneq toqusoqarneraluunniit.

§ 15-imut

Aalajangersakkami oqaatigineqarpoq, taarsigassarsisitsisoqarsinnaasooq kalaallinut, nunani allamiunut suliffeqarfinnulluunniit, taamaallaat piumasaqaataalluni pineqartut piffissami taarsigassarsiat tunniunneqarneranni Kalaallit Nunaanni tamakkiisumik akileraartussaataitaanissaat.

§ 16-imut

Imm. 1-imut

Tunisassianik ineriartortitsineq assigiinngitsorpassuarnut tunngassuteqarsinnaasutut matumani isigineqassaaq, tassami tamatumani pineqarmata isumassarsianik ineriartortitsineq ineriartortitseqqinnerlu, assilisassianik sananeq aamma misileraaneq, nioqqutissanik sullissinernillu pioreersunik ineriartortitseqqinneq il.il. Tunisassianik ineriartortitsinermut tapiissutinut tunngatillugu malugeqquneqassaaq, tunisassiap atorineqarsinnaassusia takornariartitsinermi inuussutissarsiteqarnermut imaluunniit nunani inuussutissarsitutinut killilerneqanngimmat. Assersuutigalugu aaqqissuussineq manna malillugu aalisarnermi atortut, illuaqqat assigisaasalu ineriartortinnissaannut tapiissuteqartoqarsinnaavoq.

Takornariartitsisarnermik inuussutissarsitutip iluani tunisassianik ineriartortitsineq takornariartitsisarnermik inuussutissarsitutip allatigut ineriartortinneranunut naapertuutissaaq aammalu nunap immikkoortuini, naatsorsuutigineqartumik pisisussanik tunngavissaqartuni, takornariartitsisarnermik inuussutissarsiteqarnerup ineriartortinneranunut siuarsaataasooq. Naatsorsuutigineqarpoq tunisassianik ineriartortitsineq sumiiffimmut pineqartumut nutaarsiaassaasooq.

Imm. 2-mut

Nunanit allamiunik suleqateqarsinnaaneq imaluunniit tunisassiareqqitassanik nunanit allanit pisiortorsinnaaneq aalajangersakkakut mattunneqanngilaq.

§ 17-imut

Imm. 1-3-mut

Aalajangersakkami tassani piunasaqaatit arlaqartut eqqartorneqarput, tunisassianik ineriartortitsinermut tapiiffigineqarnissamut atatillugu eqqortinneqartussat.

Siunertarineqanngilaq tapersiissutit akiliutigineqareersut utertillugit nalinginnaasumik akilersinniarneqartarnissaat tassa tapersiineq tapersiissutinik pissarsisup peqquserlulluni eqqunngitsunik amigaatilinnilluunniit paasissutissiisimaneratigut paatsoortoqarsimassappat.

§ 18-imut

Nunami inuussutissarsiutinut tunngatillugu tunisassiank ineriartortitsinermut aningaasalersuinikkut tapersiisarneq pillugu Namminersornerullutik Oqartussat nalunaarutaanni erseqqinnerusumik allaaserineqarpoq Inatsisartut inatsisaata allaffissornikkut ingerlatsineq aqqutigalugu qanoq piviusunngortinneqassasoq, tassunga ilanngullugu aningaasanik atuinermut aamma nalunaarusiortarnermut tunngasut, nalunaarullu taanna atuutiinnassaaq atortuujunnaarsinneqarnissami tungaanut, tak. Inatsisartut inatsisaanni § 21, imm. 2.

§ 19-imut

Greenland Tourism A/S, Takornariaqarneq pillugu Siunnersuisoqatigiinnut aamma Sulisa A/S-imut isumaqatigiissutinik peqareerpoq sullinneqarnissamik aqqissuussinerit pineqartut allaffissornikkut ingerlanneqarnissaat pillugit.

§ 20-mut

Aalajangersakkap taassuma imarai allaffissornikkut ingerlatsinermi aalajangikkat pillugit suliassamik ingerlatitseqqissinnaanermut periarfissat aamma naammagittaalliornissamut piffissaliussat.

§ 21-mut

Imm. 1-imut

Inatsit atortuulissaaq 1. januar 2002.

Imm. 2-4-mut

Ikaarsaariarnermi aalajangersakkani imm. 2-4-miittuni pissutsit taaneqarput, Inatsisartut takornariartitsisarnermik inuussutissarsiuteqarnermut aamma nunami

inuussutissarsiutininut aningaasalersuinikkut tapersiisarneq pillugu inatsiserisimasaat tunngavigalugit piviusunngortinneqartut, sulii sorliit atuuttut. Inatsisartut inatsisaat taaneqartut naapertorlugit siusinnerusukkat nalunaarutit suliarineqartut atuutiinnassapput atorunnaarsinneqarnissamik tungaannut.